

INUIT ATAQATIGIIT INATSISARTUNI



10.Juli 2024

UKA2024/59

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Savaateqarfinnut inoqarfinnullu allanut nannut tikiuttut qimaatinniarsareqqaarnagit takunneqqaartumit pisarineqarsinnaalersillugit Namminersorlutik Oqartussat nalunaarutaanni nr. 5-imi, 6. marts 2023-meersumi aalajangersakkat allanngortinneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nannup pisarineqartup neqaa najukkami agguanneqassaaq sinneralu pisaqartumut tunniunneqarsinnaassalluni.

(Inatsisartunut ilaasortaq, Mariane Paviasen, Inuit Ataqtigiiit)

Tunngavilersuut:

Arajutsineqanngilaq ukiuni kingullerni kujataani nannunik ajornartorsiutaasunik amerliartortunik takkuttoqartalenera. Tamanna tupinnangitsumik assut savaateqarnermik ingerlatsisunut ajornartorsiutaavoq, savaateqarneq inuilaammi najugaqarnermik nunaqqateqaratik inuunermik ingerlatsiviusuupput. Piaartumik ingerlaannartumillu peqqinnissaqarfinnut inoqarfinnullu allanut tikiuteriaannaasunik qanigisaqaratik nunaqartiterput.

Nannut savaateqarfinnut sikorsuit aqquataagunarlutik amerliartorlutik takkuttalernerisa kingunerannik savaateqarnermik inuussutissarsiuteqartut annertuummik aarleqquteqarlutik inuulersimapput, imaaginnangitsoq inuuniutiminnik annasaqartarnertik patsisigalugu kisiannili aamma ulluinnarminni nunalerinerminni nannut ilaatigut apuuttut arajutsingajavittarsinnaagamikkit, taamatullu pisoqallattaalerpoq, nalaatsornerinnakkut ilaatigut naammattoorneqarpoq nannup savaatilik taqissorluni tikingavissimagaa nalaatsornerinnarmik naammattoorneqarluni, aamma ilaqtariinnguit meerartallit ikioqtigiiillutik savat inaani suliaqarnerminni nalaatsornerinnarmik paaseriasarpaat nannup taava tikileraatik. Qujanavissumik ajornerusumik manna tikillugu pisoqanngilaq, tamannalu aamma sapinngisarput tamaat pinngitsoortitariaqarparput, nannut amerlavallaat kujataanut pisalernerisa kinguneranik uumasuteqarnermik ingerlatsisut

INUIT ATAQATIGIIT INATSISARTUNI



uummasuutiminnik qanoq annertutigisumik annasaqartarnerat manna tikillugu ilisimaneqarunangilaq, nalunangitsorli aajuna savaateqarnermik ingerlatsisut ataasiarik uumasuutiminnik nanuusimagunavissumik pisarineqarsimasumik naammattoorsisalernikuupput.

Iluaqutaanngilaq najugaqarfimmiit qimaatitsiinnarneq taamaaliornermimi kingunera tassaaginnartarpoq, nannup uteqqiinnarsinnaanera ilisimaneqanngimmat, savanik qaqqani angalasunik nerisinnaaneri nakkutigineqarsinnaanngimmat, aammalu savaateqarfiup tulliup inoqarfiup tulliup ajornartorsiutigilissavaa nannup najugaqarfimmi allami takuneqarsimasup nammineq najugarisamut apuuteratarsinnaanera tamatumalu kingunissai ernumanartut inuunerilissammatigit.

Taamaammat siunnersuutigaara naak uumasut nujuartat nungulernerarneqartaraluartut isigineqartartulli amerliartorneri ilungersunarmat kommmuni kujallermi nannunik inoqarfinnut tikiuttunik pisaqarsinnaaneq inerteqqutigineqarunnaarseqqullugu, pisarinnittullu nannup neqaa agguaallugu tunioraasinnaalissagaa, sinneralu nammineq pigilerlugu.

Innutaaqatit illersortariaqarpavut taaku inuunera nalissaqanngilaq, inuussutissarsiutaanullu ajoqusiisarnerat ilanngullugu pinngitsoortittariaqarparput. Inuup inuuneranik kinguneqannginnerani nannut inoqarfinnut qanillivallaat pisarineqarsinnaalertariaqarput.

Pisortanut aningaasatigit allaffissornikkullu kingunissai:

Siunnersuutip akuerineqarneratigit inatsimmik nalunaarummillu allannguinermmut A/C fuldmægtigit marluk ukiup affaanni suligasuarmissaat 500.000. kr-ninik annerusumik akeqassasoq naatsorsuutigineqanngilaq.

Namminersorluni inuussutissarsiuteqartunut aningaasatigit allaffissornikkullu kingunissai:

Soqanngilaq.

Innuttaasunut aningaasatigit allaffissornikkullu kingunissai:

Soqanngilaq.